

## DOVA ADEMA EF. SMAJIĆA



U ime boga Sveopćeg Milostivog!

Uzvišeni bože, mi smo se sastali u ovom skoro dovršenom islamskom centru, na časnom mjestu, s najljepšom i najuzvišenijom namjerom da se sjetimo svih Božjih vjerovjesnika od Adema alejhis-selama do Muhammeda alejhis-selama, te svih umrlih donatora i vakifa islamske zajednice u Rijeci i šire.

Uzvišeni Gospodaru, podari im lijepi džennet i mjesto u društvu Božjih vjerovjesnika, bogobojaznih i odabranih sljedbenika s kojima je Univerzalni gospodar zadovoljan.

Okupljeni u svjetlu vječne Kur'anske istine koju si uputio ljudima, na najljepšem mjestu, kojeg Ti Gospodaru najviše voliš, skrušeno Ti se zahvaljujemo i smjerno Te molimo.

Pomogni nam, Svemogućí Bože, da budemo onakvi kakvi pravi muslimani trebaju biti: vjerni, pravedni, milostivi, krjeposni, učeni, darežljivi, vrijedni davaoci i pomagači svih plemenitih akcija, a posebno požrtvovanosti kod podizanja i izgradnje Tvojih kuća, odnosno džamija.

Sačuvaj nas vlastitog i tuđeg zla te zlih, škrtih i sebičnih ljudi.

Uzvišeni Gospodaru, pomogni nam da ne zaboravimo tko smo i što smo i da nam vjera islam bude svakodnevna vodilja u našem životu.

Premilostivi Bože, mi se vrlo rado prisjećamo onih koji su ovdje, davne 1984. g., pokrenuli ideju gradnje džamije; onih koji su umrli podari im lijepi džennet

i ukabuli ovu proučenu hatmu (Kur'an) za njihovu dušu i za duše svih muslima, a oni koji su još živi podari im zdravlje i ljubav da još čvršće budu vezani za džamiju u svim vidovima: od obavljanja svakodnevnog namaza, dijeljenja obveznog zekata, te trošenja sredstava u dobrotvorne svrhe i činjene dobra.

Oprosti svim muslimanima koji su umrli, obraduj ih s ovim skupom i naše molitve upiši u dobra djela, o Svemogući!

Bože! Pomogni nam da svoju djecu odgojimo u vjeri islamu i da ih izvedemo na pravi put, kako bi bili pravi sljedbenici i konzumenti ovog veličanstvenog Mesdžida!

Bože! Daj da naša djeca budu bolja od nas u svakom pogledu, korisna za sebe i druge i da ustraju u prakticiranju vjere islama jer u tome je spas i na ovom i na onom svijetu.

Bože! Podari i ojačaj iman te omekšaj srca riječkim muslimanima i šire, onima koji se rodiše kao muslimani i muslimanke, a ne doniraše do sada ništa osim škrtosti; zamijeni im škrtost za darežljivost, nepracticiranje vjere, za prakticiranje, nedavanje zekata sa davanjem, loše navike za dobre, neiskrenost za iskrenost, neznanje za znanje, zloću za dobrotu, neosjećajnost za osjećajnost i da svoj kratki život okončamo sa spominjanjem imena, o Ti, Uzvišeni, Jedini i Apsolutni, dragi naš Bože Svemogući.

Svemogući Bože! Iskreno te molimo da na ovaj svečani dan, Dan vakifa muslimana Rijeke i šire, upišeš za nagradu ovu proučenu dovu za naše riječke Muslimane i šire, koji su preselili na onostrani svijet, da ovaj dan i slijedeći bude poticaj jačanja našeg islamskog bratstva, te daj predvodnicima našim u Islamskoj zajednici u Republici Hrvatskoj snage, umijeća i zdravlja da ustraju sa svim plemenitim akcijama.

Bože obaspi sve ljude svojom milošću diljem svijeta i uputi ih na pravi put.

Bože, upiši nam za nagradu ovo naše okupljanje i učenje. Ja rabbel alemin. Amin.